

勝天王般若波羅蜜經

才三

羽三

七十一

47485



元祿九年丙子二月日重脩

皇圖聖圖 帝漸銀呂

佛日增輝 懋輪崇轉

山城州天安寺法金剛院置

勝天王般若波羅蜜經卷第三、

羽

陳優禪尼國王子月婆首那譯

勝天王般若波羅蜜經法性品第五

尔時勝天王即從座起偏袒右肩右膝著地  
合掌向佛頭面作禮而白佛言希有世尊如  
來應供正遍知快說微妙大神通力諸佛如  
來因何得此唯願世尊分別解說佛告勝天  
王言大王諸佛如來所行甚深不可思議得  
果亦尔勝天王白佛言世尊諸佛如來行何  
等法名為甚深不可思議佛告勝天王言大  
王諸佛如來法性因果不可思議功德及法  
利益衆生亦復如是勝天王白佛言世尊云

何法性不可思議佛言大王在諸衆生陰界  
入中無始相續所不能染法性體淨一切心  
識不能緣起諸餘覺觀不能分別邪念思惟  
亦不能緣法離邪念無明不起是故不從十  
二緣生名爲無相則非作法無生無滅無邊  
無盡自相常住大王菩薩摩訶薩行般若波  
羅蜜能知法性清淨如是無染無著遠離垢  
穢從諸煩惱超得解脫此性即是諸佛法本  
功德智慧因之而生體性明淨不可思議大  
王我今喻說汝善諦聽王言世尊唯然願聞  
佛告勝天王譬如無價如意寶珠在嚴瑩治  
皎潔可愛體圓極淨無有垢濁墮在淤泥已

經多時有人撿得取而守護不令墮落法性  
亦尔雖在煩惱不為所染後復顯現大王諸  
佛如來悉知衆生自性清淨客塵煩惱之所  
覆蔽不入自性是故菩薩摩訶薩行般若波  
羅蜜應作是念我當勇猛勤修精進為諸衆  
生說是甚深般若波羅蜜除其煩惱一切衆  
生皆有性淨是故於彼勿生下劣應當尊重  
彼即我師如法恭敬菩薩摩訶薩作如是心  
即生般若闍那大悲大王菩薩摩訶薩如是  
行般若波羅蜜能入阿鞞跋致地大王菩薩  
摩訶薩行般若波羅蜜復作是念此諸煩惱  
無力無能自體虛妄與淨相違何以故背薩

婆若故清淨法性爲諸法本自性無本虛妄  
煩惱皆從邪念顛倒而生大王譬如四大依  
虛空立空更無依煩惱亦尔依此法性法性  
無依大王菩薩摩訶薩行般若波羅蜜如實  
觀知不起違逆以隨順故煩惱不生大王菩  
薩摩訶薩觀察煩惱不生染著若自染著云  
何說法令他出離是故菩薩斷滅著心如實  
說教解衆生縛菩薩摩訶薩行般若波羅蜜  
復作是念若生死中有一煩惱利益衆生我  
則攝受菩薩摩訶薩行般若波羅蜜復作是  
念如昔諸佛行般若波羅蜜應如是行何以  
故諸佛如來昔在因地亦如是學成菩提故

以此二緣是故菩薩種種方便知此法性大  
王如是法性無量無邊爲諸煩惱之所隱覆  
隨生死流沉沒六道長夜輪轉隨衆生故名  
衆生性菩薩摩訶薩行般若波羅蜜起厭離  
心除五塵欲修無上道是時此性名爲出離  
過一切苦故名寂靜爲究竟法一切世間之  
所樂求一切種智常住微妙因此法性能得  
自在受法王位大王菩薩摩訶薩行般若波  
羅蜜初中上位觀察法性一切平等本來寂  
靜悉無罣礙猶如衆色不能滿空菩薩摩訶  
薩行般若波羅蜜如實而知諸佛所說一切  
衆行如量修行法性功德不可具說無有二

相過一異境平等一切覺觀不行菩薩摩訶  
薩如是行般若波羅蜜能除二相人相法相  
一切凡夫爲執所縛不識不見不得法性菩  
薩摩訶薩行般若波羅蜜則能通達如此法  
性若在衆生無二無別何以故如如不異故  
大王菩薩摩訶薩行般若波羅蜜依此法性  
修諸善根來入三有利益衆生雖現無常而  
非真實何以故菩薩摩訶薩行般若波羅蜜  
如實見法性故具足方便大悲願力不捨衆  
生二乘凡夫無有如此大悲本願是故不見  
圓淨法性大王菩薩摩訶薩行般若波羅蜜  
如是觀法性一切聖人無能修者無所修法



無能行者無所行法無心無心法無業無果  
報無苦無樂如是觀者名得平等不異遠離  
隨順廣大無我我所無高無下真實無盡常  
住明淨何以故一切聖法由此成就因是性  
故顯現聖人大王諸佛如來無邊功德不共  
之法從此性生由是性出大王一切聖人戒  
定慧品從此性生諸佛菩薩般若波羅蜜從  
此性出是性寂靜過諸名相性是真實則離  
顛倒性不變異故稱爲如聖智境界名第一  
義非有非無非常非斷非生死非涅槃非染  
非淨離一離異無名無相大王菩薩摩訶薩  
行般若波羅蜜復作是念法性離相一切法

離相無二無別何以故一切法離相即法性  
離相法性離相一切衆生離相同法界離相  
法界離相一切法離相如是離相求不可得  
法性如如衆生如如同一無二衆生如如法  
性如如同一無二法性如如一切法如如無  
二無別一切法如如諸佛如如無二無別法

引  
三

三

性如如過去未來現在如如不相違逆過去  
如如未來如如亦不相違過去未來現在如  
如即是陰界入如如陰界入如如即是染淨  
如如染淨如如即是生死涅槃如如生死涅  
槃如如即是一切法如如大王所言如者名  
爲不異無變不生無諍真實以無諍故說名

如如如實知見諸法不生諸法雖生如如不  
動如如雖生一切諸法如如不生是名法身  
清淨不變猶如虛空無等等一切三界無有  
一法所能衆者遍衆生身無與似者清淨離  
垢本來不染自性明淨自性不生自性不起  
在心意識非心意識性即是空無相無願遍  
虛空界諸衆生處一切平等無邊無量無異  
不別非色不離色非受想行識不離受想行  
識非地大水火風大不離地大水火風大無  
生離生雖逆生死不順涅槃眼不能見耳不  
能聞鼻不能嗅舌不能嘗身不能覺意不能  
知不在心意識不離心意識大王是名法性

菩薩摩訶薩行般若波羅蜜通達此法修行  
清淨三千大千世界若閻浮提城邑聚落喜  
薩悉能示現色身所現身者非色非相而現  
色相非六根境而化衆生常無休息爲說此  
身無常無我苦不淨法了知衆生有寂靜性  
能爲示現無量種身善巧方便令彼受化知  
一切身無有作者亦無受者猶如木石而爲  
衆生說清淨行大王菩薩摩訶薩如是行般  
若波羅蜜通達法性即得自在無有移動而  
起智業遊戲神通種種示現安住自在而能  
示現種種威儀自在能趣一切種智皆悉通  
達一切諸法大王般若波羅蜜如是自在是

無盡相遍一切處無色現色自在遍觀諸衆  
生心見如實心心性自在憶念無邊數劫相  
續不斷自在變化任解脫相自在盡漏為衆  
生故不證漏盡自在出世是聖智境自在甚  
深聲聞緣覺所不能測自在堅牢魔不能壞  
能至道場成就佛法最為第一自在隨順轉  
大法輪自在調化一切衆生自在受位得法  
自在大菩薩摩訶薩行般若波羅蜜如實  
通達甚深法性得是自在菩薩摩訶薩修是  
自在即得諸禪解脫三昧三摩跋提不繫欲  
界色無色界何以故遠離一切虛妄分別煩  
惱繫縛顛倒執相若其受生於生自在無有

繫縛若欲現滅亦復自在隨其生處恒攝大  
乘成就佛法而於十方推求佛法竟不可得  
一切諸法同一佛法非常非斷何以故推求  
此法不可得故以如實理求不可得是法不  
可說有說無說亦無名相過此境界若離名相  
即是平等若法平等即無執著無可著者是  
法真實若著真實即是虛妄以不著故即非  
虛妄無所滯著心即無礙無礙即無障無障  
即無諍無諍即同虛空是法不繫欲界不繫  
色界不繫無色界若一切處無所繫屬是法  
無色無相無形若法無色無相無形是法應  
如是知隨彼境界而離能知亦離所知何以

故是中無有少法可覺少法能覺是名菩薩  
摩訶薩行般若波羅蜜通達平等大王菩薩  
摩訶薩行般若波羅蜜觀大慈大悲大喜大  
捨不見我不見衆生不見命不見人雖行布  
施而調伏心離戒相心而淨持戒以無盡心  
修行忍辱離心精進以寂靜心修習禪定心  
無所緣修行般若心念四處以平等心修習  
正勤離戲論心修諸神足分別衆生觀察諸  
根離愆失心修諸根力以分別心觀察覺分  
無功用心修習正道心無所著而有淨信自  
然智慧憶念諸法平等智心修諸三昧不分  
別心觀般若波羅蜜以止息心修奢摩他無

所見心修毗婆舍那無所念心而修念佛通  
達法界平等之心而修念法無所住心而修  
念僧本心清淨教化衆生不起分別法界之  
心攝一切法如虛空心淨佛國土無所得心  
得無生法忍無進退心得阿鞞跋致遠離相  
心不見有相三界平等心莊嚴道場心能覺  
知一切諸法轉於法輪不見聽說示現涅槃  
而知生死本性平等大王菩薩摩訶薩行般  
若波羅蜜如是觀諸法不見能觀不見所觀  
即時能得遊戲自在何以故自在清淨能見  
一切衆生淨故大王譬如虛空遍滿一切菩  
薩摩訶薩行般若波羅蜜心亦如是說此法



時眾中八万四千人天發阿耨多羅三藐三  
 菩提心三万二千菩薩得無生法忍八万四  
 千眾生得遠塵離垢法眼淨一万二千比丘  
 皆得漏盡佛告勝天王言大王菩薩摩訶薩  
 行般若波羅蜜心得清淨深大如海功德智  
 慧不可測量菩薩摩訶薩能現出世諸功德  
 寶眾生用之乃至菩提無有盡竭菩薩功德  
 亦復不減猶如大海多出眾寶菩薩智慧甚  
 深難入聲聞緣覺無能涉者亦如大海小獸  
 不入菩薩智慧廣大無邊何以故無著無住  
 無色無相菩薩智慧從初至後次第轉深初  
 菩提心後薩婆若菩薩法亦不與煩惱及惡

知識而共止住世間智慧若入菩薩智慧之中相一味所謂無相薩婆若無分別味菩薩摩訶薩觀一切法不見法增不見法減何以故通達平等深法性故菩薩摩訶薩大慈悲力不違本願一切聖人之所依處爲諸衆生永劫說法無有窮盡大王菩薩摩訶薩行般若波羅蜜通達如是甚深法性大王菩薩摩訶薩善能通達世諦衆法雖說諸色而非實有推求此色終不取著受想行識亦復如是雖說地大而非真實推求地大終不取著水火風空識亦復如是雖說眼入而非真實推求眼入終不取著耳鼻舌身意亦復如是雖

復說我而非真實推求覓我終不取者衆生  
命養育人作者壽者知者見者亦復如是雖  
說世間而非真實推求世間終不取者雖說  
世法而非真實推求世法終不取者雖說佛  
法而非真實推求佛法終不取者雖說菩提  
而非真實推求菩提終不取者大王凡有言  
說名爲世諦此非真實若無世諦第一義諦  
則不可說菩薩摩訶薩行般若波羅蜜通達  
世諦不違第一義諦即通達之知法無生無  
滅無壞無此無彼悉離語言文字戲論大王  
第一義者離言寂靜聖智境界無變壞法若  
佛出世若不出世性相常任是名菩薩通達

第一義諦。尔時勝天王白佛言。世尊。若一切諸法不生不滅。自性空離。云何有佛出世。及轉法輪。云何菩薩於無生法而見有生。佛告勝天王言。大王。法不滅。故不生。何以故。性不變異。故但以世諦因緣。見有生。滅皆是虛妄。非真實。有菩薩摩訶薩。行般若波羅蜜。善巧方便。見因緣法。即知世諦。悉空無有。不見堅實。似有如影。如炎響。幻不安。搖動。從因緣生。菩薩摩訶薩。以般若波羅蜜。觀諸法空。乃至從因緣生。作是思惟。此等諸法。今見有生。有住。有滅。何因緣生。何因緣滅。即作是知。無明因緣。故生。諸行依行。生識。識生。名色。名色生。

六入六入生觸觸生受故凡夫起愛渴愛生  
取以因取故則相續有由有故生生則有老  
老故有死憂悲苦惱是故修行爲斷無明無  
明若斷餘十一分則亦復滅譬如人身若斷  
命根餘根靡用大王邪見外道爲求解脫但  
欲斷死不知斷生若法不生則無有滅譬如  
有人塊擲師子師子逐人而塊自息菩薩亦  
尔但斷其生死而自滅大唯逐塊不知逐人  
塊終不息外道亦尔不知斷生終不離死大  
王菩薩摩訶薩如是行般若波羅蜜善知因  
緣諸法生滅大王菩薩摩訶薩行般若波羅  
蜜知緣生法空無實有不起我慢若生波羅

門刹利居士長者之家不起二慢尊貴豪富  
若生貧賤自知宿業不甚清淨得報下劣心  
起厭離即求出家作是思惟如我此身雜業  
所得更修淨業令自清淨使他亦令自既求  
度亦復度他自求脫離亦解他縛以是因緣  
即生精進不墮懈怠障道惡法皆為斷除助  
道善法悉應增長勤修精進作是思惟我負  
重擔應當自滅一切煩惱度脫衆生不得懈  
怠菩薩摩訶薩行般若波羅蜜親近師僧多  
聞寡聞有知無知持戒破戒但生佛想恭敬  
同學思惟我今依師學習修善未滿悉令滿  
足煩惱未盡斷之今盡擁護善法捨離不善

一切種智憐愍愍世間大悲福田寂靜天人師  
是我大師善得吉利一切天人皆事法王以  
為大師菩薩摩訶薩行般若波羅蜜作是思  
惟佛說淨戒設為身命亦不毀犯如世尊說  
隨順佛教即供養佛若婆羅門刹利居士長  
者種種飲食信心施與如法受用不令彼人  
空法果報食者施者俱得利益婆羅門刹利  
居士長者以沙門名而召菩薩作福田想菩  
薩應當如理如量修行正法即令顯現沙門  
功德福田功德菩薩如是自行化他不曾休  
廢菩薩摩訶薩行般若波羅蜜如是修行則  
能隨順一切世間見瞋恚者生下劣心見高

慢人起無我想見邪曲人起正直想見妄語  
人起如實言於惡口人常說愛語見剛強者  
示現柔和見礮毒人則行慈忍見邪法人則  
生大慈見苦衆生則起大悲見慳嫉人則行  
布施大王菩薩摩訶薩行般若波羅蜜如是  
隨順世智生淨佛國何以故持戒無缺離諸  
雜穢修平等心於衆生所具大善根不著名  
利清淨之信無所望報勤行精進不生懈怠  
修諸禪定離散亂法以微妙慧而習多聞諸  
根不缺具足利智常修大慈遠離瞋惱以是  
因緣生淨佛國尔時勝天王白佛言世尊如  
佛所說修戒等法生佛國土爲備修行一行



亦生佛告勝天王言大王若有菩薩摩訶薩  
於前所說種種法中淨修一行即備衆法如  
是一行得生淨土何以故一一行中具衆行  
故大王菩薩摩訶薩行般若波羅蜜如是得  
生淨土不爲胎汙何以故菩薩摩訶薩造作  
佛像修葺伽藍如來塔前香泥塗地燒香供  
養或以香湯浴洗佛像於伽藍內掃灑泥塗  
菩薩摩訶薩供養瞻省父母之身師僧同學  
及諸沙門以平等心皆悉供養迴此善根爲  
一切衆生迴向阿耨多羅三藐三菩提令得  
清淨菩薩摩訶薩如是行般若波羅蜜即得  
離俗何以故心無取著不染朋黨背諸境界

遠離愛緣境界不染世尊說戒如實修行少  
欲知足隨宜四事趣足過時心常怖畏樂寂  
靜離大王如是菩薩摩訶薩行般若波羅蜜  
不著俗法即得淨命無偽威儀口意欺詐於  
施主前終不詐偽現身威儀安祥徐步視前  
六尺若背檀越即便縱誕於施主前不為利  
養下聲細語軟美之言順彼意語若背檀越  
則便自縱見他行施口言不用心實欲須如  
是名為內心熱惱口現少欲心貪利養大王  
菩薩摩訶薩行般若波羅蜜悉無此偽離求  
利相若見檀越不得發言三衣弊壞鉢器闕  
無或須湯藥於施主前不得發言某甲檀越

施我此物彼人謂我持戒多聞大悲心淨雖  
尔讚嘆我無此德唯當修行報施主恩菩薩  
摩訶薩不應如是自讚毀他隨順白衣而求  
利養若施餘人勿生瞋惱不作諂曲而以取  
財不詐親善害他取物不爲他人戲弄取財  
檀越擬施或讚嘆人若說法者或擬大衆或  
復未擬或施未決菩薩不得入中取分若受  
施財不應執著此是我有此是我物即當迴  
施沙門師僧父母及餘貧乏平等受用若財  
物盡不以生憂少日不得心無苦惱大王菩  
薩摩訶薩受施迴與二俱清淨行清淨故心  
不疲勞何以故菩薩摩訶薩行般若波羅蜜

爲利衆生久處生死而不厭患若有魔事衆  
苦逼切心無轉退若人欲行二乘之道即爲  
說法不憚疲勞菩薩自修助菩提法無有厭  
勸大王菩薩摩訶薩行般若波羅蜜如是精  
進則能隨順佛正教行何以故菩薩摩訶薩  
行般若波羅蜜離諸放逸心常謹慎善攝自  
身不作諸惡不善之法口意亦尔菩薩摩訶  
薩行般若波羅蜜雖處現在恒懼未來一切  
諸惡不善之法斷之不生言必附理常說法  
教非法不言悉棄穢業純修淨行不毀佛教  
遠離煩惱不淨之法是名擁護如來正教一  
切諸惡不善之法悉斷離之大王菩薩摩訶

薩行般若波羅蜜如是隨順佛清淨教視諸  
 衆生面門先笑曾無嗔感所以然者心離穢  
 濁諸根清淨不染離垢心不瞋恚內無恨結  
 菩薩摩訶薩如是行般若波羅蜜即得多聞  
 觀察生死能如實知欲火熾然瞋火焚燒愚  
 癡之火常所迷亂亦如實知有為無常一切  
 行苦諸法無我世間衆生耽著戲論一切法  
 中唯有涅槃乃為寂靜若聞他說即思惟義  
 傳以授人發大慈悲起堅固意若不聞法則  
 無思修是故聞慧猶如字本一切智慧因之  
 而生既得多聞則護正法大王未來之世正  
 法滅時其有衆生樂勤修行不值法炬無人

為說甚深之法。尔時菩薩即為演說甚深妙法。所謂般若波羅蜜。今諸衆生得戒定慧。又讚之言。善男子。如是末世正法滅時。汝等能發菩薩之心。求阿耨多羅三藐三菩提利益。衆生此般若波羅蜜。三世諸佛之所行者。汝若勤修。則去阿耨多羅三藐三菩提不遠。何以故。般若波羅蜜不離菩提。譬如有人種穀。已秀。當知收穫。必在不久。菩薩亦尔。求阿耨多羅三藐三菩提。得聞般若波羅蜜。當知決定去佛不遠。大王。若善男子善女人。捨離般若波羅蜜。更依餘法。求阿耨多羅三藐三菩提。無有是處。猶如王子捨其父王。更就餘人。

求爲太子決不可得菩薩亦尔求薩婆若必  
因般若婆羅蜜得譬如犢子若欲須乳必依  
其母若就餘牛則不可得大王菩薩摩訶薩  
親近般若婆羅蜜常爲法王子相莊嚴身以  
好爲華嚴飭身相諸根不缺如來行處常所  
遊行所行之道隨佛如來所覺而覺救護世  
間苦惱衆生善能通達佛所說教常修梵行  
守護如來薩婆若城大王菩薩摩訶薩行般  
若波羅蜜爲法王子釋梵護世之所尊重何  
以故行菩薩道阿鞞跋致一切諸魔所不能  
動安住佛法通達一切空平等理不信外緣  
如是安住佛法智慧不與聲聞辟支佛共超

過世間任無生法忍大王菩薩摩訶薩行般  
若波羅蜜能如實知一切衆心貪欲瞋癡上  
中下品亦如實知善心堅固心如實知已各  
各爲說諸對治法如是則能善化衆生菩薩  
摩訶薩行般若波羅蜜若有衆生應見佛身  
受化度者菩薩摩訶薩即現佛身而爲說法  
應以菩薩身化度者現菩薩身應以辟支佛  
身而受化者即現辟支佛身應以聲聞身受  
教化者即現聲聞身應以帝釋梵王婆羅門  
刹利長者居士身受教化者皆爲示現而度  
脫之大王菩薩摩訶薩如是行般若波羅蜜  
教化衆生菩薩摩訶薩行般若波羅蜜心性



慈和正直軟善無諸諂曲嫉妬垢穢心常清  
淨言語不麤遠離惡口多行忍辱親狎衆生  
大王菩薩摩訶薩如是行般若波羅蜜則在  
處安樂所以然者具足正見及清淨見清淨  
之行所行境界與心相應若心相違惡不善  
法如是境界及染穢處斯則不行菩薩摩訶  
薩行般若波羅蜜見同學人心生歡喜若財  
若法與他共用唯行一道所謂佛道唯佛爲  
師不尊餘人大王菩薩摩訶薩行般若波羅  
蜜如是在處安樂具諸攝法而攝衆生以利  
益施安樂施無盡施攝取衆生利益語有義  
語如法語不異語攝取衆生以財利益平等

身利益平等命利益平等資具利益平等攝  
取衆生大王利益施者即是法施安樂施者  
即資生施無盡施者即示現道利益語者今  
彼生善有義語者今彼見理如法語者隨順佛  
教不異語者說如實法財利益平等者可食  
可噉可飲可噉可舐及衣服等身利益平等  
者如以攝衛利益己身令他亦尔命利益平  
等者真珠琉璃珊瑚瑪瑙名爲外命資具利  
益平等者象馬車乘一切淨財菩薩摩訶薩  
行般若波羅蜜自行與他皆悉共同大王菩  
薩摩訶薩行般若波羅蜜受生端正常能修  
習寂靜威儀不僞威儀清淨威儀人所樂見

內外溫善觀者無厭能悅人意一切衆生之  
所愛重其有見者皆發善心瞋恚者見心即  
得解大王菩薩摩訶薩行般若波羅蜜如是  
端正則堪依止守護衆生今煩惱滅能將衆  
生出離生死無邊曠野能度衆生世間險難  
爲無眷屬而作親友爲煩惱疾而作良醫無  
救護者爲之救護無歸依者爲作歸依無明  
衆生爲作法炬菩薩摩訶薩行般若波羅蜜  
爲諸衆生而作依止治諸疾病如藥樹王譬  
如善見大樹根莖枝葉華菓色香味觸悉爲  
衆生療治衆病大王菩薩摩訶薩行般若波  
羅蜜亦復如是從初發心爲諸衆生治種種

疾諸煩惱病菩薩摩訶薩功德智慧有疾病者見聞皆差菩薩摩訶薩行般若波羅蜜常與功德相應隨力所堪供養三寶若有疾病即施湯藥若見飢渴即施食飲若見寒凍即施衣服師僧和上盡心承奉同學法人合掌恭敬造立伽藍布施田園時時隨有捨與衆僧下使隸役如法料理聞有名德沙門婆羅門修道行者時時往詣大王菩薩摩訶薩行般若波羅蜜能生諸善有巧方便教化衆生於此佛國身不移動而遊無量諸佛世界諮問正法於此佛國身不移動而遊無量諸佛世界聽受正法於此佛土身不移動示現無

量諸佛國土供養如來於此佛土身不移動  
而遊無量諸佛世界成就無上菩提資糧於  
此佛土身不移動而遊無量諸佛世界若有  
菩薩成佛道者供養恭敬於此佛土身不移  
動無量世界示現成道於此佛土身不移動  
無量佛國現轉法輪於此佛土身不移動無  
量佛國示現涅槃於此佛土身不移動無量  
佛國應得度者爲示化身皆悉今見亦無分  
別有所作意尔時勝天王白佛言世尊云何  
菩薩摩訶薩作種種化無分別心佛告勝天  
王言大王譬如日月照四天下而無分別我  
照天下爲作光明衆生業報自感日月光照

天下菩薩摩訶薩行般若波羅蜜亦復如是  
雖現化身而無分別何以故衆生各有宿世  
善業菩薩摩訶薩昔從因地修行發願爲度衆  
生以此願力隨其所念皆悉應現無分別心  
大王菩薩摩訶薩行般若波羅蜜如是方便  
善巧教化速向阿耨多羅三藐三菩提何以  
故菩薩摩訶薩行檀具足持戒清淨無穿毀  
雜戒聚清淨過諸聲聞辟支佛境界具足忍辱  
精進禪定般若方便願力智如來世尊不共功  
德一切具足已過聲聞辟支佛地大王菩薩  
初地乃至十地行般若波羅蜜修如是行得  
阿耨多羅三藐三菩提說是法門時衆中二

万天子得遠塵離垢法眼淨三万菩薩摩訶  
薩得無生法忍八万四千天人發阿耨多羅  
三藐三菩提心無量百千億卽闍婆緊那羅  
皆悉合掌讚嘆如來繞耆闍崛山無量百千  
億夜叉衆雨諸蓮華遶耆闍崛山十方無量  
恒河沙世界菩薩來集讚歎如來世尊使說  
甚深般若波羅蜜爲諸菩薩世尊因此般若  
波羅蜜得有人天須陀洹向須陀洹果乃至  
阿羅漢向阿羅漢果辟支佛道菩薩十地十  
波羅蜜如來十力四無所畏十八不共法一  
切種智從般若波羅蜜中出世尊譬如世間  
一切衆生悉依虛空而空無依般若波羅蜜

亦復如是一切法本而自無依願今我等於  
未來世爲諸菩薩摩訶薩說般若波羅蜜如  
今佛說又以種種香華散如來上今時耆闍  
崛山天神及餘集者空中讚言我等憶念過  
去之世無量諸佛於此耆闍崛山中說是般  
若波羅蜜法亦如今日今時勝天王白佛言  
世尊空中諸天云何得知如來境界久遠之  
世佛說是般若波羅蜜事佛言大王此諸天  
等皆住不可思議解脫是故能知過去遠事  
大王我昔爲菩薩時亦經生彼天神之道見  
無量佛成道說法乃至涅槃我常讚歎合掌  
禮拜何以故彼天神道壽命長故今時衆中



有一天子名曰光德即從座起偏袒右肩右  
膝著地合掌向佛頭面作禮白佛言世尊諸  
佛菩薩應遊淨土娑婆世界是不清淨云何  
世尊出現此土今時佛告光德天子諸佛如  
來所居之處無有穢土於是世尊即以神力  
現此三千大千世界地平如掌琉璃所成無  
諸山陵阜埏荆棘處處寶聚香華輦草流泉  
浴池八功德水七寶階砌樹木華菓咸說菩  
薩不退法輪無有凡夫唯見十方諸大菩薩  
不聞餘音唯聞般若波羅蜜聲處處蓮華大  
如車輪青紅赤白一一華中皆有菩薩結跏  
趺坐即見如來於大眾中爲諸菩薩說甚深

法無量百千釋梵護世前後圍遶供養恭敬  
尊重讚歎希有世尊希有世尊所說無虛真  
實不二如世尊說諸佛任處實無穢土衆生  
薄福而見不淨世尊若有善男子善女人得  
聞般若波羅蜜名字甚為希有況復書寫受  
持讀誦為他演說佛言若善男子善女人無  
量百千劫以無礙心施他財物若復有人以  
淨信心書寫此經傳授與人功德多彼何以  
故財施有竭法施無盡何以故施財但能得  
世間果若人若天昔已曾得得已墮落今還  
復得若以法施昔未曾得今始能得所謂涅  
槃若三千大千世界一切衆生有人教化悉

今安住十善道中若善男子善女人以淨信心受持讀誦般若波羅蜜爲他人說功德勝彼何以故一切善法皆從般若波羅蜜生故若三千大千世界一切衆生有人教化皆得須陀洹斯陀含阿那含阿羅漢果辟支佛道若復有人信心受持讀誦書寫般若波羅蜜功德勝彼何以故聲聞辟支佛法皆從般若波羅蜜中生一切菩薩摩訶薩法皆從般若波羅蜜中生因此般若波羅蜜故有佛出世般若波羅蜜所在之處當知即是菩提道場轉法輪處應念此處即我大師如來應供正遍知處在此中何以故一切諸佛皆從般若

波羅蜜生故若人供養如來形像不如供養  
般若波羅蜜何以故三世諸佛皆因般若波  
羅蜜生故

勝天王般若波羅蜜經卷第三

羽

鞞跋

致上步迷謂不退地

鞞

許救

塊

傾對反

慘

毒

反七感也

縱

誕

下上子用反

但大也

慢也

戲

揮

下

弄

憚

徒旦反

也

躄

丁舍反

收

獲

下胡郭反

犢

子

上

噉

牛

噉

音朔

正作

舐

時只反

差

字

隄

隄

隄

帝

上

反

羸

料理

上音

阜

城

反

小

音

婦

下

土

回

荆

棘

上音

紀力

反



